

LIBRARY OF CONGRESS



0 008 847 068 0

山東
嶧
歷
城
縣
志

一至十六冊

卷一至十六

四

ORIENTALIA
CHINESE
V. 192
S. 4
F. 11
1640

✓
B192
S F / H
1640

册 13
卷 14上

歷城縣志卷十四

邑人葉承宗撰

藝文志 三

詩賦

三百篇實惟詩始然恢奇靈幻寓痛哭於調笑莫如大東而平陵東乃繼其響東國文章自昔奇特初唐則有崔安成盛宋則有李文叔

昭代則有邊庭實李于鱗加以李杜晁曾之所標題趙虞王薛之所遊詠嗣後人載奚囊家富縹帙如也予志詩賦于古人卽不關山水亦書于今人

546931
Jan 12 '40

九日登千佛山寺

邊貢

南山空翠嶽野老倦登臨城郭千年迹雲霄萬里
心夕陰涵積水風葉下長林短髮新來白黃花不
可簪

遊千佛山寺

邊貢

亭午登山寺淹留夕未歸涼風起高樹落葉滿僧
衣城郭寒烟聚樓臺暮景微京華十載客愁絕賞
心違

遊千佛寺

邊貢

非關山水不書其或筆不足發靈秘韻不足蓮等
夷卽關山水亦不書楊生日簡而核盡而不汗其
諸歷山之詩史與

雜咏

大東

東國困於役而傷於財
譚大夫作此以告病

有饜簋殽有抹棘七周道如砥其直如矢君子所
履小人所視瞻言顧之潛焉出涕

小東大東杼袖其空糾糾葛屨可以履霜佻佻公
子行彼周行既往既來使我心疚

有冽洿泉無浸獲薪契契寤歎哀我憚人薪是獲
薪尚可載也哀我憚人亦可息也

東人之子職勞不來西人之子粲粲衣服邦人之
子熊羆是裘私人之子百僚是試

或以其酒不以其漿鞞鞞佩璲不以其長維天有
漢監亦有光跂彼織女終日七襄

雖則七襄不成報章皖彼牽牛不以服箱東有啓
明西有長庚有抹天畢載施之行

維南有箕不可以簸揚維北有斗不可以挹酒漿

維南有箕載翕其舌維北有斗西柄之揭

平陵東

王莽篡漢丞相翟方進少子義時爲濟守舉兵不克見劫殺其門人作平陵東

歌哀之

平陵東松栢桐不知何人劫義公劫義公在高堂
下交錢百萬兩去馬兩去馬亦誠難顧見追吏心
中慟心中慟血出漉歸告我家賣黃犢

叙寄員半千

唐駱賓王

薄宦三河道自負十餘年不應驚若羈羈爲直如
弦坐歷山川險吁嗟陵谷遷長吟空抱膝

冲天魂歸滄海上望斷白鴈前釣名勞拾紫隱迹
自談玄不學多能聖徒思鴻寶仙斯志良難已此
道豈徒然嗟爲刀筆吏耻以繩墨牽岐路交情合
人倫地本偏長揖謝時事獨往訪林泉寄言二三
子生死不來旋

贈崔融二十韻

唐杜審言

十年俱薄宦萬里各他方雲天斷書札風土異炎
涼太息幽燕紫勞歌奇樹黃日疑懷叔度夜似憶
真長北使從江左東歸在洛陽相逢慰疇昔相對

叙存亡草深窮巷毀竹盡故園荒雅節君彌固衰
顏余自傷人事盈虛改交遊寵辱妨雀羅爭去翟
鶴驚競尋王思極驩虞至朋情詎可忘琴樽橫硯
席巖谷臥詞場連騎追嘉賞城中及路傍三川宿
雨霽四月曉花芳後此開懸榻寧唯入後堂興酣
鵠鶴舞言洽鳳凰翔高選俄遷職嚴程已飭裝撫
躬銜道義攜手戀輝光玉振先推美金銘舊所防
勿嗟離別易行復共時康

隴頭水

唐員半千

榮期

路出金河道山連玉塞門旌旗雲裏度楊柳曲中
喧蹀血多壯膽裹革無精魂嚴霜斂樹色大明辭
朝曦塵銷營卒壘沙靜都尉垣霧捲白山出風吹
黃葉翻將軍獻凱入萬里絕河源

關山月

唐崔

融

安成全節

月生西城上氣逐邊風壯萬里度關山蒼茫非一
狀漢兵開郡國胡馬窺亭障夜夜聞悲笳征人起
南望

曉發齊州道中

宋歐陽脩

永叔廬陵

東州幾日倦征軒千騎驟驪白草原鴈入寒雲驚
曉角鷄鳴滄海浴朝暎國恩未報身先老客思無
聊歲已昏誰得平時為郡樂自憐消渴馬文園

離齊州後

宋曾鞏子固南豐

雲帆十幅順風行臥聽隨船白浪聲好在西湖波
上月酒醒還對紙窗明

畫船終日扒沙行已去齊州一月程千里相隨是
明月水西亭上一般明

文犀刻刻穿林筍翠玉田田出水荷正是西亭第

暑日却將離恨寄烟波

將家須向習池遊難放西湖十頃秋從此七橋風
與月夢魂嘗到木蘭舟

荷氣夜涼生枕席水聲秋醉入簾幃一帆千里空
回首寂寞船窻祇自知

惜華橋

宋曾鞏

鴈翅橫連杜若洲碧欄干影在中流蓬萊日月遊
人到誰道仙風解引舟

寄齊州同官

宋曾鞏

卷十四 詩賦 友聲堂

西湖一曲舞霓裳。勸客花前白玉觴。誰對七橋今夜月，有情千里不相忘。

詠史

宋李清照

易安
邑人

西漢本繼紹新室，如贅旒所以稽中散。至死薄殷

周

送山東廉訪炤磨于思容

元趙孟頫

子昂
吳興

林稍春動紫烟生。匹馬東風十日程。若到濟南行樂處，城南泉上最關情。

初到濟南

元趙孟頫

自笑平生少宦情。龍鐘四十二山城。青山歷歷空懷古，流水泠泠盡著名。官府簿書何日了，田園歸計幾時成。道途黃髮驚相問，只恐斯人是伏生。

東城

元趙孟頫

野店桃花紅粉姿。陌頭楊柳綠烟絲。不因送客東城去，過去春光總不知。

偶成

元趙孟頫

竹林深處小亭開。白鶴徐行啄紫苔。羽扇不搖紗帽側，晚涼青鳥忽飛來。

至李漉之宅得鎮紙玉蟾 元虞集 伯生

聖恩深念魯東家，林木蕭條散暮鴉。
丹詔先令脩古廟，彤庭即日遣皇華。
閣中學士馳山驛，天上文星絢綵霞。
偶為傳宣到書閣，就牀奪得玉緞縠。

過濟南

黃福

往年載酒藕花湖，醉筆曾將翠袖塗。
今日驂停楊柳陌，名泉雖有故人無。

題得池荷送別李獻吉

邊貢 庭實 邑人

送別晚池前，池花媚碧漣。
根從華峰徙，名自越溪

傳。細雨香生佩，濃烟錦照箋。
留連絲筒飲，相約在

明年

登濟南城樓

王廷相 浚川

齊山水菓下，海氣已驚秋。
故國三年別，王孫萬古

愁。青雲心自逸，白壁道難酬。
鼓角風塵際，懷鄉獨

上樓

立春夜同謝茂秦李于鱗宅賦

殷士儋 正甫 邑人

寒夜同樽酒，驚逢客裏春。
殘燈話鄉曲，浮世嘆風塵。
宦旅空華髮，山人自葛巾。
年來成底事，翻媿滯

朝紳

送楊子政還濟南

李攀龍子鱗邑人

我家白雲渚。落日掩孤城。讀書草堂上。濯纓湖水清。古來失意事。不獨名未成。北風敝裘雪。誰見棄襦情。

和峇殿卿冬日招飲田間

李攀龍

白雲湖上北風寒。茅屋蕭條兩鵝冠。我自能憐華不注。推窻君試雪中看。

許殿卿郭子坤見枉林園

李攀龍

佳客卽良夜。此會安可期。結髮爲兄弟。晤言今在茲。層臺挺浮雲。河漢宛其垂。積陰躍列宿。三五正參差。前山殿影亂。雨勢坐已移。皎月出平陵。徘徊當照誰。清光澄暑氣。颯若撤長帷。潦水明樹間。流飈淡華榭。零露響空林。聽砧鳴以悲。世路良獨難。斗酒多所宜。達人忌榮名。千載同一時。

春日周都闔招飲其宅。蓋亡友梁國史第也。愴然有感。

劉天民希尹邑人

樂事曾於客歲違。賓筵嘆息主人非。平章宅裏花

仍發王謝簾間燕自飛寒火尚供酤到酒春娥爭
化舞殘衣黃金莫惜沉酣盡白髮何如故友稀

得于鱗湖邊舊舍居之

王象春

季木
新城

草堂略似浣花居况是先生手澤餘不比謝墩爭
姓字但須更貯滿樓書

西門道

王象春

古道朝京踏作河寒泉無奈熱腸何東門一樣垂
官柳只是西門送客多

雨望

晴日北門登眺趣勝於他處至雨則不
及西南二樓可以北望相渚南眺隱岫乍

有乍無氤氳萬狀夏日冒雨
一臨始悔坐簷底聽霖鈴也

王象春

齊城宜向雨中看萬室炊烟晚意寒須是米顛親
潑墨他人皴法便枯乾

晴望

馬耳鹿角青童玉符白雲諸峯嵌空補缺
遠在天末惟晴後轟轟盡出點青抹翠不
移時便隱沒矣非
閒人不能挹此妙

王象春

初聞水面燕呢喃雪盡西風龍入潭睡氣推窻延
爽氣天邊添出幾峯巒

紀勝

禱雨龍洞山

元趙孟頫

蒼山如犬牙。細路入深谷。絕壁千餘仞。上有凌雲木。陰崖不受日。洞穴自成屋。蕭森人跡少。蒼蔚獸攸伏。雲林忽隱映。澗道相迴復。翔禽薄穹霄。鳴鳥響巖曲。臨橋濯清颺。汲井漱寒玉。神物此淵潛。愆陽有所祝。風漓慙善教。吏俗耻厚祿。暫懷塵外想。獨往疑有牯。過幽難久居。濟勝乏高躅。策馬尋故蹊。歸樵相追逐。

遊龍洞

邊貢

鳥路縈迴洞壑深。出塵風景愜招尋。山圍下界青天迥。日照中巖翠栢森。浮世何須論去住。病身元不厭登臨。釣磯無恙綸竿整。悵望仙潭玉鯉沉。洞門黃葉鎖秋深。野客來遊悵古今。恍惚漫傳龍迹在。虛明真似佛光臨。蒼天日月流元化。白晝雲雷起太陰。昏黑下山蘿逕遠。殿鐘龕磬裊餘音。

遊龍洞山

邊貢

愛山無奈野情何。路入西巖興轉多。千丈碧潭通窈窕。四圍青壁抱嵯峨。時清不射將軍虎。地迥難求道士鵝。却對嶺牛歌白石。醉翻朱袖拂雲和。

遊龍洞寺

范

瑟

孔和邑人

荒寺丹青古。寒泉野店深。龍游天表去。洞向石巖陰。座外明珠水。林間聽梵音。何時起支遁。相對法華琴。

宿龍洞與魏使君同賦

李攀龍

迴壑深林繞梵宮。春來吟眺使君同。空潭忽散三峰雨。暗穴嘗吹半夜風。人擬二龍精自合。詩看五馬步逾工。諸天坐失懸鐙色。明月先投入掌中。

使君春興滿綈袍。綵筆青山對濁醪。望去天迴雙

闕迴。坐來雲盡一峰高。蛟龍出入嘗風雨。鴻鵠拏

飛自羽毛。愧我淹留逢楚客。攀援桂樹咏離騷。

削成東壁五雲屏。下有龍宮夜不扃。斗柄故臨雙

鏡轉。月明嘗對一珠亭。春回竹葉盃光白。天逼蓮

花劍氣青。坐久空山仙籟寂。新詩獨爲故人聽。

香色中峯獨不羣。藤蘿二月已紛紛。諸天近海金

銀氣。雙峽長春錦繡文。塔影半空懸落照。溪流一

曲灑浮雲。從令洞口龍吟發。郢調還須讓使君。

酬張轉運龍洞山之作

李攀龍

春山遙上翠微連。忽出藤蘿一徑懸。削壁雲霞開
五色。中峯日月隱。諸天浮漚竝結金龕。麗飛寶雙
銜石甕圓。莫怪驪珠君已得。寒湫元自有龍眠。

遊龍洞寺

李攀龍

壁削芙蓉萬仞丹。禪林隱隱畫圖看。人間勝地僧
多占。洞裏諸天客到難。雲傍龍來晴作雨。風從澗
底暑生寒。年來勝有烟霞癖。石畔長松好掛冠。

錦屏春曉

張 弓

希仲
也人

萬仞芙蓉翠作攢。曉瞳春倚玉欄杆。丹崖而
如削。碧陣團團畫亦難。石甕嵐光千古秀。龍湫
色四圍。寒開花野草。尋常願貰酒。鳴琴幾度看。

邀嚴侍御遊錦屏山洞

中丞黃克纘

溫陵

錦屏春色近如何。滿澗寒雲蔭淺莎。晴日蔽虧山
宛轉。亂藤高下石嵯峨。聲傳谷底人相應。路入巖
中客暗過。不是政閒邀一醉。齊川歲月竟蹉跎。

龍洞

王在晉

康侯
黎陽

鍊壁嵯峨劒戟森。穹岩倒插擁雲岑。天邊黃鶴時
迎氣。洞口龍涎欲作霖。珠瀑紛翻晴亦雨。石梁飛

駕午嘗陰憑虛共發孫登嘯流水高山一畝襟

龍洞

何之望

古越

鑿開混沌是何年徑轉谿迴別有天千丈碧屏雲
漠漠三泓清鑑水濺濺岩深法相衣如繡絕壁仙
葩山欲燃龍臥此中人不識却將霖雨叩重玄

同張元平遊龍洞

劉

勅

君授邑人

金刹香飄翡翠烟桃花千樹隱諸天層巒倒曳山
雲直削壁中懸石甕圓寺廢猶能留衲住洞深嘗
意有龍睛一樽喜對張平子徒倚松門細論禪

錦屏春曉

宋廣業

錦屏環繞濟城東無限春光麗曉曛翠黛陰陰和
露碧丹砂點點帶霞紅幽花古木參差見複澗回
巒屈曲通更說與雲能致雨恩溥齊魯仰神功

錦屏春曉

程兆麟

扶桑遙映錦屏風螺染朝霞花市濃拾翠柳絲偏
繁客避兵煙燼盡歸農龍吟澤底因時躍松蓋雲
霄不待封洞裡春深迷去住散人原未計秋冬

錦屏山

崑山李采

雲峰映日紅於染。煙樹含春翠欲流。絕似列屏開錦繡。畫圖雖好那能儔。

錦屏春曉

古吳朱璋

叠嶂如屏望遠空。谿迴徑轉似難通。蒼松色映烟蘿碧。丹壁光搖曉日紅。勝比落陽三月錦。芳逾金谷萬花叢。興來擬欲留題去。只恐詩人遜化工。

錦屏春曉

茂苑周袞

日照晴山耀碧穹。桃花迷洞笑春風。千紅萬紫攢如錦。一幅丹青在望中。

趵突泉

宋魯鞏

一派遙從玉水分。晴川都灑歷山塵。滋榮冬茹濕嘗早。潤澤春茶味更真。已覺路傍行似鑑。最憐沙際湧如輪。層城齊魯封疆會。况託娥英詫世人。

趵突泉

元趙孟頫

樂水發源天下無。平地湧出白玉壺。谷虛久恐元氣泄。歲旱不愁東海枯。雲霧潤蒸華不注。波濤聲震大明湖。時來泉上濯塵土。冰雪滿懷清興孤。

趵突泉

元張養浩

希孟邑人

繞欄驚視重徘徊流水緣何自作堆三尺不消平
地雪四時嘗吼半天雷深通滄海愁波盡怒撼秋
濤恐岸摧每過塵懷爲瀟灑斜陽欲沒未能回

酌突泉

元張養浩

物平莫若水堙阻乃有聲云胡在坦夷起立若紛
爭無乃滄海穴泄漏元氣精不然定鬼物搏激風
濤驚

酌突泉和趙松雪韻

王守仁

陽明
餘姚

溲源特起根虛無下有鰲窟連蓬壺絕喜坤靈能
爾幻却愁地脉還時枯驚湍怒湧噴石竇流沫下
瀉翻雲湖月色照衣歸獨晚溪邊瘦影伴人孤

咏酌突泉

中丞胡纘宗

玉屋流來山下泉清波聊酌思冷然雲含雪浪頻
翻地河湧三星倒映天滾滾波濤生海底芃芃蕙
萼散城邊秋光一片凌霄漢最好乘槎泛斗前

飲酌突泉

王廷相

濟水東來伏泉開湧玉林愧疑焦釜沸翻訝石堂
沉作澤隨雲遠成波助海深春回潛躍遂鬱有美

魚心

飲酌突泉

王越

一泓清氣湧波瀾，幾度曾於醉裏看。
玉杵亂春珠，顆碎冰壺倒浸雪花寒。
龍吹海沫潮聲急，鬼剗山根石眼寬。
誰為蒼生作霖雨，天瓢攜得上雲端。

飲酌突泉

葉冕 嶺南

一脈原從天上來，翻濤如怒震如雷。
千年玉樹波心立，萬疊冰花浪裏開。
神液暗分天地髓，靈光嘗護水晶臺。
飛龍有日還收去，散作甘霖徧九垓。

丁丑春日再過泉亭酒家

許邦才 殿鄉邑人

酌突泉頭賣酒家，板橋迤邐跨河斜。
東風解出丹青意，畫出垂楊間杏花。

吼雷噴雪更流霞，味比中泠特地嘉。
醉後詩脾渾作渴，旋烹雀舌摘藤花。

酌突騰空

張弓

奪目驚人萬馬蹄，一泓流出綠楊堤。
靜深遠透崑崙窟，芳潤羞同河水泥。
噴薄源源誰是本，波濤蕩蕩竟何棲。
人間那得嘗如此，應有蛟龍地下啼。

灤源飲邊一丈

光廬廬吾邑人

尋幽到灤源相對倒金樽嵐氣連城白泉聲入夜
喧綈袍知已在華髮故交存醉矣霜天曉依投月

下門

咏泉

馬三才仁和

碧水通靈穴芳亭俯淺涯源驚騰地出勢欲上欄
斜散影飄暗雪迴光落鏡花仙爐終日沸何處覓

丹砂

題酌突泉

邑令張鶴鳴元平

宓靈碎剪夜光綃笑擲波心雪浪矯倒捲銀河穿
灤底遙捧海月湧江潮驚看乳竇投珠珮響應水
壺冷玉簫我欲掛冠從卜築抱棗直傍水西橋

酌突泉

王在晉

大地山河氣鬱蒸瓊漿珠瀑亂飛凌暗噓靈谷嘗
分雨冷冽西風不見冰石鉢龍涎聲似沸海天鼉
鼓急如鑿源頭何處通幽漠夜月寒潭水自澄
城市飛塵混莽蒼生來池館挹清涼噴珠滴瀝穿
瑤島霏玉依稀度石梁太液波澄分振鷺昆明露

冷墜蓮房淨將濁眼嘗看世一曲滄浪引興長
 銀海龍潛氣欲驕翻飛玉浪帶水綃雷門日擊馮
 夷鼓帝女時鳴洞岳簫地闢靈泉疑帶雨風迴石
 溜忽驚潮酌將清茗甘于露俗眼塵襟亦可消
 古樹干霄散早暉灤源門外有漁磯鳳城曉色千
 巖翠龍窟靈泉百道飛清沁玉壺分沆瀣涼生其
 露浥霏微混元晝夜長流逝莫向仙源問息機

酌突泉觀麥畦

中丞呂純如占吳

一隙靈源鬼斧開飛濤噴沫亦奇哉全將鮫室珠
 璣出並挾龍宮風雨來四面青山連埤堦十年白
 雪倚樓臺郊遊處處成欣賞况有甘霖發麥垓

酌突泉

沈道全疑之四明

靈源拓跡是何年突湧疑穿松底天濺石迷空晴
 亦雨飛濤噴雪裏猶寒明珠亂落天花墜玉乳長
 浮地肺聯我欲乘流窺海藏恐驚龍女駕瑤軒

酌突泉

潘一桂京口

靈源幻不測潛流無停山根厄泉騰隨地爭沸
 騰石竇來怒雪沙隙滂繁星隱雷曉壑霽急雨空

堂清壯音薄霄影跳沫浴風樞鮫人舞晴淚龍女
搏春冰曲沼括神瀑球欄戟幽亭玲瓏納霞月浩
渺涵空青元氣生不窮靜見天地英靈奇醒遊日
未敢投塵纓

趵突泉

長洲宋廣業 澄溪

名傳歷下冠諸泉王屋尋源豈偶然倒捲銀濤凌
碧落紛飛雪浪破蒼烟恍疑湧地分三峽直欲乘
風上九天幾度來看嘆奇絕塵心盡滌若神仙

趵突泉

長洲宋志益 亮虞

靈源不竭響潺潺對此能令萬慮蠲噴沫勢同飛
雨雪隱雷聲欲撼山川臨流顧影當明鏡激浪生
花湧白蓮盡日憑欄觀不厭夕陽橋外樹陰偏

趵突泉

秀水徐陽和 育蕃

突起奔泉湧似潮溯流來自岱陰遙聞雷出地騰
三窟噴雪翻風入九霄

趵突泉

古吳朱 璋 玉章

濟南趵突泉稱最金線珍珠取次論三窟淵源涵
地脈一泓清淺見山根恍疑蜀水傾巫峽却似河

津激禹門我欲神龍吸將去借爲霖雨被乾坤

趵突泉

黃山程榮增

靈源滾滾似珠圓歷下名泉獨占先爭說古來流
不竭未知開鑿自何年

遊華不注登後追咏

唐李太白

昔我遊齊都登華不注峯茲山何峻拔綠秀如芙
蓉瀟灑古仙人了知是赤松借余一白鹿自挾雙
青龍含笑凌倒影欣然願相從

登華不注山

唐杜甫子美

岱宗夫何如齊魯青未了造化鍾神秀陰陽割昏
曉盪胸生層雲决眦入歸鳥會當凌絕巔一覽衆
山小

登華感賦

宋曾鞏

虎牙千仞立巉巖峻拔遙臨濟水南翠嶺瀟峯晴
可掇金輿陳跡久誰探高標特起青雲近壯士三
周戰氣酣丑父遺忠無處問空餘一掬野泉前

遊華不注

元張養浩

蒼烟萬頃插孤岑未許華山冠古今翠刃刺雲天

倚劍白頭歸第日揮金攀援直欲窮危頂歌舞休
教阻壯心星月滿湖歸路晚不妨吟棹碎清陰

與轉運諸公登華不注山絕頂 李攀龍

中天紫氣抱香爐複道金輿落帝都二水遙分青
嶂合一峯深注白雲孤岱宗風雨通來往海色樓
臺入有無不是登高能賦客誰堪灑酒向平蕪

華不注晴望 李攀龍

颺紫芙蓉第一枝層雲吞吐弄奇姿斜陽倒影明
湖裏還似當年三匝時

岱遠悠悠興來不覺諸天迥未是斜陽到上頭

華不注 憲長雷 達省上曲豐城

怪石崢嶸薄碧空巨靈何此卓巖從三齊城郭湖
光裏一代風塵眼界中移坐頻斟消野興振衣欲
上倚穹窿徘徊忽憶垂堂戒惆悵雲梯月色東

同嚴侍御登山 中丞黃克纘

一徑迢迢上翠微洞門深處憇斜暉孤高欲競南
山聳窈窕如含細雨飛載酒峯頭酣野色行春郭
外霽霜威珠宮不瞰明湖水醉泛蘭舟待月歸

同遊次中丞黃公韻

侍御嚴一鵬

姑蘇

寂寂山陰花事微。攜樽選勝倚斜暉。危峰翠嶺形如墜。怪石參差勢欲飛。已慶桑麻霑雨澤。還教狐鼠避霜威。登臨不盡探奇興。日暮蘭橈醉月歸。

登山

劉執中

邑人

當日三周事若何。那如一醉白雲阿。須知世上浮名客。不似山中得趣多。

詠山

邑令陳

陞

晉卿
亳都

嶙峋高峙小清前。直達山根泊畫船。半日遙浮紅

日動。一峯半與白雲連。捫蘿倏可凌霄外。載酒還看到斗邊。南望羣峯無數處。何如孤嶂插青天。

華不注

劉勅

亂石堆雲立孤峯。入碧天杯浮銀漢水。袖挽海門烟帆影。清流外湖光落照邊。好乘白鹿去蓬島。覓羣仙。

華不注

王象春

單椒桀立虎牙懸。鎖盡狂奔七十泉。怪得仙人赤松子。獨將鹿借李青蓮。

同諸友登華不注

王大儒

汝爲
邑人

看山如讀書熟則刪所戀層折取其新卽此窺候
變不注近桃蹊登臨良我便茲則獨淹留衆前我
則殿獨酌眺歸鴻諸峯開面面風日發寒香秋老
霜林綺

登華不注山歌

王廷相

岌嶪登齊城瞰華不注峯蒼壁峭孤雲怪石蟠虬
龍驚風噴盪萬里來靈氣直與秋爭雄岱麓羣峯
秀孌娜蓮蕊芙蓉萬千朶白日雲霞相蔽虧梁父

徂徠明一火崑崙華不注別出三山支仙人移家
過西海墜落拳石成崔巍平地突兀青刺天不一
倚附資維持我昔東遊走其下泉上磐石一停馬
翠磴查牙不得上胸次巉天詎能瀉濟水奔流東
入海綠波遶山年年在紫鳳不來烏鳶翔石上琅
玕日沉彩嗚呼風塵瀕洞兮逢時之危龍蛇遁藏
兮豺狼恣睢孤臣獨立兮不愧茲石浩蕩沈寥兮
極于兩儀

望嶧山

宋曾鞏

一峯孤起勢崔巍秀色拖藍入酒杯靈葉已隨霜
露得平湖嘗泛雪雲迴翰林明月舟中過司馬虛
亭竹外開我亦退公思蠟屐會看歸路送人來

峭山院

宋陳師道

後山
彭城

小試登山脚今年不用扶微微交濟灤歷歷數青
徐樸俗猶虞力安流尚禹謨終年聊一快吾病失
醫盧

峭山亭

宋曾鞏

大亭孤起壓城巔屋角峨峨插紫烟灤水飛綃來

城裏看山山愈幽依微城畔雨初收樓臺影浸花
千畝烟水晴歸鷺一洲人在木蘭俱是客月來香
國更宜秋輕橈去去寒烟外醉拍紅橋又放舟

大明湖

王象春

萬派千波競一門崗巒廻合紫雲屯蓮花水底危
城出路似鑊金翡翠益

同劉五雲泛舟

沙門照肩

雪公
雲間

一逕清涼蔭綠多水邊茅屋狎鷗過一生事業堪
彭澤五字禪餘媿鳥窠柳下維舟曾泛雪風前傳

葦蕙拈荷肯教勝事虛林壑爲向磯頭訪釣簑

暮春泛大明湖

王大儒

春暮明湖烟樹賒扁舟如葉盪輕沙斜陽浸水分
流影遠岫拂晴帶晚霞興欲豪時聞楚調路逢岐
處問漁家幾星燈火催暝色明月橫橋映岸花

明湖泛舟

長洲宋廣業

澄溪

停橈把盞傍菰蒲到此能令暑盡無天送好風來
水國人披爽氣坐冰壺阜民正叶南薰曲攬勝何
殊西子湖更有娛情耽賞處紅蓮綠葉白莎息

野岸峭山浮黛入晴天少陵騷雅今誰在東海風
流事漫傳太守自吟還自笑歸時乘月尚留連

登山

張珣

長步

峭山清絕倦躋攀烟雨溟濛白晝間燕子來時花
片片鷓鴣啼處竹斑斑碧蘿洞口穿丹井玉筍峯
尖聳翠鬢我欲追隨謝公屐脩然乘興訪東山

咏山

王象春

萬岫千巖濟水蟠如屏孤逗出河千秋高鳥鵲翔
何事霄漢空疑牛女寒

咏山

劉勅

一片孤峯俯大清，凭高遙聽水流聲。翠屏倒逐水
濤白，丹竈長懸夜月明。帆挂斜陽波影動，舟橫野
渡棹歌鳴。山中靈藥應還在，卜築巖頭度此生。

鵲華烟雨

張弓

城外雙峯亦自奇，最奇人說窈冥時。初驚暗淡形
將隱，倏似飄蕭勢欲移。西子粧成羞獨照，巫娥行
處恐人知。卽當命酒湖橋上，指點東西說九疑。

大明湖

宋曾鞏

湖面平隨水面長，碧天垂影入清光。一川南露荷
花曉，六月蓬瀛几簟涼。滄海桴浮成曠蕩，明湖槎
上更微茫。何須辛苦求人外，自有仙鄉在水鄉。

湖上早春

元趙孟頫

谿上春無賴，清晨坐水亭。草芽隨意綠，柳眼向人
青。初日收濃霧，微波亂小星。誰歌采蘋曲，愁絕不
堪聽。

湖上暮歸

元趙孟頫

春陰柳絮不能飛，雨足蒲芽綠更肥。政恐前呵驚

白鷺獨騎欵段繞湖歸

遊湖有感

元趙孟頫

肇余復鄉土樹石皆華滋
沔彼湖波綠頓覺香可
卮攜朋訪蓮葉浩浩從何之
俯視亂山影與樹相
參差商飈一披拂夾岸蛟龍嬉
舉手欲攬玩復恐
陽侯悲平生慕天遊不意今有茲
赤壁坡仙笛泯
陂少陵詩二子孰可繼沙鷗弄晴曦

大明湖

元張養浩

浮空帆影泝流光箕踞船頭倒羽觴
喚出湘靈歌

一曲水雲搖蕩暮山蒼

水開東北泛舟晚造希尹別業

邊貢

隱隱輕雷動水西水東殘日抱晴霓
女橋倒颭紅旗影農屋斜連綠稻畦
張相池臺烟漠漠閔公祠墓草萋萋
迴舟不盡登臨興却棹涼風過別溪

泛湖北抵華不注夜從陸歸

邊貢

浮舟出近郭落日半溪陰
水濶蒹葭淨山寒烟霧深
壺觴不盡興絲竹有餘音
獨恨黃花少猶煩隔浦尋

湖水雜詠

邊貢

雲水池臨三憲節江湖天放一漁舟
虛煩徒倚看黃帽可耐乘槎泛碧流

漾漾蓮舟繫古槎沉沉波影照烏紗
多情最喜雲中客乘興來看水際花

水岸風迴晚更涼菰蒲零亂拂衣裳
扁舟莫到花深處恐礙波心日月光

萬竹陰陰暑氣微主人迎客敞山扉
翻然使節傳呼近驚起舟前白鳥飛

新正九日徑行湖上命酒小酌 劉天民

春初間理棹來泛雪餘湖亂指青螺
出長看白練鋪魚遊依密藻雉雉下
平蕪坐聽分漁石雲烟抱酒壺

湖上候陳盧趙三按察 劉天民

采舟久繫湖邊柳綺席遙張草際亭
避暑欲謀河朔醉感時豈效屈原醒
爲憐菡萏媚蒼水不分鳧鷗點綠萍
栢府更攜香醞至漁歌獨向月中聽

秋日湖上燕集卽事

許邦才

詞客清秋興勃然城湖霽景晚澄鮮歸雲讓出搖
波月密柳邀來結暝烟撲盞荷風香澹澹薄空雲
吹夜綿綿更遭歌舞催人醉猶恨羈遲送酒船

春初邀殷少保劉國戚湖泛

許邦才

春風佳興動亭臺况是濃芳水木偎帶雪山從城
外見負冰魚逐網中來湖平自信方舟入家近何
妨倒載廻公等不緣逢聖至尊前得共濟川才

明湖泛舟

張弓

乘輿挈舟結伴來藕花香處鑑光開青娥佐酒停

歌航白鳥嘶魚上釣臺波影仙才欣得句夜涼鯨
吸數傳杯浮生過眼俱塵夢得似閒情亦快哉

泛湖

谷繼宗 少岱 邑人

北門行指出東月坐觀生筆硯風騷意簫鏡水調
磬酒帘翻樹暗漁灶倚灘明醉語舟師致無妨臥
入城

遊湖望華不注

潘子震 邑人

西霽湖光湛碧天正堪沽酒上漁船波間倚棹看
山影樹底行厨接水烟遙想少陵遊歷下猶聞太

白賦華巔秋來偏愛林塘好况對清風明月前

遊湖十絕

邑令張鶴鳴

元平
汝陰

荷葉包魚綠竹港磁餅酌酒藕花洲棹歌不斷菱
風急吹入白蘋灣盡頭

點點青螺華不注團團飛鏡大明湖相傳玉女梳
粧處濟上于今有畫圖

北極仙祠白玉關燒香女伴鬪雲鬟憑高笑撚荷
花蒂指點湖東看峭山

鴛鴦沙暖蒲芽長翡翠巢空蘭葉齊峭華橋畔東

風急綠柳千條盡向西

佛山影落鏡湖秋湖上看山翠欲流花外小舟吹
笛過月明香動水雲舟

白雲寂寞下空陂綠藻芳舟繫槿籬海內名亭都
不見令人却憶少陵詩

獨抱瑤琴近水樓登樓一奏廣寒遊花裏絃歌聲
細細月明堪上采蓮舟

酒傾荷葉臨風吸網得鱖魚帶藻烹偶從玉女祠
東過繫看蘭橈吹玉笙

我是湖山吏隱身年來最與白鷗親
會波泉上夕陽裏紫翠玲瓏透鴨茵

港口分舟夾岸迷青青
芟草拂衣低水波雲起湖光白
十里清香綠稻畦

大明湖

劉勅

一川清禁水滙作百花洲
倒影搖青嶂澄波映畫樓
舟橫竹港外人坐釣磯
頭尚客嘗來此開樽對白鷗

明湖泛舟

王儼

大明湖

晉陵謝嵩齡

參差人影落晴湖
棹入蒹葭路轉紆
村笛山歌殊不惡
溪禽樹鳥自相呼

明湖泛舟

古吳朱璋玉章

一點清心映水心
喜來湖上敞衣襟
酒杯豈是陶情物
歌管寧爲悅耳音
蘆渚風和晴浴鷺
柳堤日暖晝鳴禽
浪遊饒有臨流興
欲寫高懷待月吟

大明湖

歷城朱永思在莪

一帶清溪幾曲流
溪迴棹轉夕陽收
峰巒缺處露

茅屋楊柳陰中藏釣舟薄靄不迷林外寺好風偏
到水邊樓人生樂事渾難得乘興還須秉燭游

大明湖

甫里陳培脉

暮秋天氣泛輕舸新漲初添水半篙有約再來應
記取蓼花深處歇蘭橈

皓山湖

唐李 白

初謂皓山近寧知湖水遙此行殊訪戴自可緩歸
橈

水入北湖去舟從南浦迴遙看皓山轉却似送人

來

湖濶數十里湖光搖碧山湖西正有月獨送李膺
還

嵒山湖

唐杜甫

野亭逼湖水歇馬高林間
鼉吼風披浪魚跳日映
山蹙遊徂詞伯却望懷青
關藹藹生雲壑惟應促
駕還

嵒山湖送維正李憲副

邊貢

齊門東沙逕平雲漠漠湖冥冥使君來來麥秋晚柳

陰陰畫舟遠瘦蒲疎荇逗暹香南浦烟光接西塢
堰北山靈鳥相聚對面潺湲華不注山前綠稼隱
茅茨舊是齊儂釣遊處橫橈越水滸飛踏青芙蓉
華陽洞口跨白鹿醉吹玉笛呼眠龍長鋪野老逐
李邕錦袍仙人隨赤松石壁土花秋靡靡古蹤悠
悠鎮如此要留灑翰洗蛙蟬滿林夜黑啼山鬼

峭山湖

王廷相

漫漫峭湖水 中夏如巨壑 一舸沉中潭 蕩漾杳難
泊 鼓角奮以揚 蛟螭靜不惡 簌弄紅錦湍 播商翠

華薄陰霞倏明滅 游禽靄紛錯 發棹梵音浦 把酒
北城閣 悵茲人代速 湖山宛如昨 不聞北海還空
覽 少陵作高標 耀白日浮踪 等飛藿 湖水清且漣
玉纓不復濯 吾生諒有涯 昔賢徒龍夔 俛首忽悲
嘯 且盡手中爵

峭湖

王象春

江都爲主少陵賓 一代風流問水濱 魚鳥陸沉魂
怨恫 幾時重啓外湖堙

峭山湖

李應聘

邑人

太液渾如鏡裏看漁人垂釣
峭湖干曉涵萬頃玻
黎淨夜浸中天星斗寒
細雨濛濛添鴨綠微風拂
拂動鷗瀾燒丹此日今何在
山色蒼蒼夕照殘

遊大佛山

應大猷 杏庵

山中廊榭倚山斜風日逢秋靜
且嘉樹色坐憐楓
下葉野香行愛菊垂花崖穿石溜
含清露磴絕巖
扉隱赤霞客久與僧蹤跡合來遊
此地便忘家

集開元寺

李攀龍

流陰拂層岑返照翳深谷古寺入
蕭條迴巖抱幽
獨梵影靜香臺鐘磬敲石屋絕壁
棲禪頌懸崖下
樵牧秋花雨還瘦老樹霜逾禿寒
泉可瑩心白雲
况極目登臨客自佳搖落時何速
疏色蕩腥羶苔
光清簡牘新詩發神秀舊遊耿初
服歸來杖屨便
老去烟霞伏高城出埤現燈火通
林麓言旋轉多
興後期此同宿

大佛寺

李攀龍

西湖斜日淨風烟北嶺岩巉出半
天磴道乍從空
外轉樓臺已入鏡中懸塔分西域
銅餅勢石紀秦

官錦纜年白社但須彭澤酒青山不用華家錢波
搖玉樹堪雙映月上珠林好獨眠我輩自在君莫
訝平生未敢認周旋

大佛寺

藩叅張孟

携尊扣竹寺放浪醉中仙覓句行松嶺濯纓傍石
泉潭深蒼霧合碑古碧苔鮮坐聽三車演鐘聲入
夜眠

佛山賞菊

張弓

木落天空凋萬卉幽巖老菊始芬芳壺觴遠就秋
光冷嶠嶼深藏晚節香高會祇今傳盛事浮生何
日不窮忙西風破帽難收拾遮莫黃花笑客狂

大佛山

王象春

登高須上大佛頭紅樹黃花急暮秋佛慧寺傍看
石壁試茶幾代有題留

大佛山

劉勅

去廓十餘里山迴石徑幽白雲嘗覆寺黃菊最宜
秋塔影樽前轉湖光望裏收甘泉幾滴水能解世
人愁

白雲亭

德藩莊主

印月池頭月正明主人曾此濯冠纓肯誇風景殊
人世却愛源流合聖清素魄西沉還有影微波東
逝去無聲詩成孺子歌堪擬未許滄浪獨得名

白雲亭泛舟

王

翊

灤江

禁城春曉泛晴湖萬象光涵一鑑鋪合浦月寒珠
錯落靈臺風起玉模糊白魚黃鳥隨歌扇碧石青
莎入畫圖七十二泉遊覽遍獨疑今日在蓬壺

白雲亭次灤江韻

邊

貢

曲池泉上遠通湖百丈珠簾水面鋪雲影入波天
上下蘚痕經雨岸模糊間來夢想心如見醉把丹
青手自圖二十六年回首地碧闌朱樹隔芳壺

觀珍珠泉遊湖

中丞陳鳳梧

廬陵

仙舟縹緲度銀河倒瀉芙蓉萬頃波亭在水心浮
日近柳絲堤畔受風多中流鼓吹魚龍躍四面峯
巒紫翠羅疑向蓬萊遊弱水陽春白雪聽高歌

白雲亭

陳鳳梧

牆外宮花照眼明珠泉遙送棹歌聲山亭雲渡疑

昨碧水殿風來透骨清
杏薦春盤香沁齒
蒲分雪酒醉含情
飄然興在滄浪外
便覺軒裳一念輕

和殿卿白雲亭醉歌

李攀龍

狂殺王門客
空亭自嘯歌
那知珠履散
自愛白雲多
短髮明秋水
長裾曳芰荷
獨憐枚叟在
不復厭婆娑

珍珠泉宴賞

王世貞

嘉泉靈沼向齊稱
百道清涼地裏騰
烟烟驪水迴
夜色盈盈鮫淚奪
秋澄初疑碧漢翻
金屑忽訝明河瀉
玉繩最是霑恩歌
湛露賜來尊酒又如澗

白雲雪霽

張弓

望雲帝子構雄圖
雪後登臨幾自呼
霽色浮金連岱嶽
寒光射目失明湖
浪傳海上開蓬島
不道人間控玉壺
安得梁園同授簡
倚闌白戰看模糊

登會波樓

元張養浩

何處登臨思不窮
城樓高倚半天風
鳥飛雲錦千層外
人在丹青萬幅中
景物相誇春亘野
古今皆夢水連空
濃粧淡抹坡仙句
獨許西湖恐未公

會波晚照

張弓

閒雲漠漠淡晴空柳堰漁舫晚色同
幾處名泉歸宿大一湖清影夕陽通
殘霞映水明天外孤鷺衝人點鏡中
何日持竿隨落照烟波影裏釣長虹

歷下亭

唐李邕

吾宗固神秀體物寫謀方泰山雄地理
巨浸渺雲莊高興泊煩促永懷清與嘗
含弘知四大出入見三光負郭喜粳稻
安得歌吉祥

歷下亭陪李北海

唐杜甫

東藩駐皂蓋北渚凌清河海右此亭古
濟南名士多白雲已發興玉佩仍當歌
脩竹不受暑交流空湧波蘊真愜所適
落日將如何貴賤俱物役從公難重過

新亭結構罷隱見清湖陰跡藉臺觀舊
氣冥海岳深圓荷想自昔遺堞感至今
芳宴此時具應想千里心主稱壽尊客
筵秩宴北林不阻蓬華興得恭梁父吟

登歷下亭

元張養浩

童年曾記此遊遨，邂逅重來感二毛。
翠繞軒窗山陸績，碧縈城郭水周遭。
風流誰道江南好，人物都傳海右高。
怪得登臨詩興淺，鵲華曾見謫仙豪。

歷下秋風

張弓

誰結空亭當歷下，大明湖上獨生幽。
西風潑地菰蒲老，鴻鴈連天絡緯秋。
四壁蕭條聞落葉，滿城波浪見虛舟。
疎櫺浙瀝遊人少，恐憶蓴鱸動客愁。

北渚亭

宋曾鞏

四楹虛徹地無隣，斷送孤高與使君。
午夜坐臨滄海

海口半天吟看泰山雲，青徐氣接川原秀。
嘗礪風連草木薰，莫笑一樽留戀久。
下階塵土便紛紛，振衣已出塵埃外。
卷箔更當風雨間，泉聲漸落石溝澗。
雲氣迥壓金輿山，寒河漠漠鳥飛去。
野路悠悠人自還，耕桑千里正無事。
况有尊酒聊開顏。

北渚亭

李攀龍

窻中采蓮舟，落日菱歌起。
坐見浣紗人，紅顏照秋水。

水

五日與殿卿遊北渚

李攀龍

青樽盡舫晴湖濱風俗遙傳楚逐臣潦倒只今君
自見那能嘗作獨醒人

五月五日榴花杯故國故人北渚來君今不飲紅
顏去那有長絲繫得回

北渚亭

光廬

去矣風塵惡湖亭敞素秋拂衣金馬巷卷幔水蘭
舟岬峴同蒼岫滄浪下白鷗自憐心皎潔可以比
寒流

水香亭

宋曾鞏

臨池飛構鬱岩巖樞櫺無風影自搖羣玉過林抽
竹翠雙虹垂岸下平橋頰依美藻魚爭餌清見寒
沙水滿橈莫問荷花開幾曲但知行處異香飄

環碧亭

宋曾鞏

水心還有拂雲堆日月應須把酒杯楊柳巧含烟
景合芙蓉爭帶露華開城頭山色相圍出眼底波
聲四面來誰信瀛洲未歸去兩川俱得小蓬萊

水面亭

中丞黃克纘
溫陵

湖上東風退舊寒故交携手有新歡笙歌半爲深

談廢燈燭偏宜遠
听看敢向中流論
擊楫還從大雅識
登壇因思北海當
年宴歷下高亭此
會難

水面亭

陳應元

白下

論心話舊一尊前
風送荷香媚遠天
酒遇劉伶醒亦醉
月逢庾亮過還圓
雄談欲醉珊瑚樹
小酌堪凌玳瑁筵
聞說聖朝新右武
好投文筆去籌邊

水面亭

劉勅

水面何年結此亭
憑欄一望遠山青
荷香十里湖光濶
日日開筵遲客星

✓
B192
S4F/H/
1640

册 14
卷 14下

夕陽衰草路登登雨過秋山爽氣層松殿可因參
佛理蘚牆聊爲覓詩凭且拚醅酌陪仙侶莫把輪
迴叩老僧北望古城蒼翠裏萬家樓館炊烟疑

杪秋同右史南山眺望

李攀龍

南山有幽意駕言此徘徊湖波蕩寒城四座清光
開金天澄素影秋氣何悲哉繁陰逝白日浮雲閒
往來落葉颯中林流颺激巖隈朝昏上烟火原隰
被樓臺故鄉無滯淫世路多塵埃念我平生歡離
思壯難裁

青樽何處不蹉跎白髮相看一醉歌坐久鏡中懸
片華望來城上出雙河松杉滿壁浮雲滿砧杵千
家落照多縱使平臺秋更好故山猶恐未能過
回首飛鴻碣石標清霜處處錦林凋層巒倒映平
湖淨積翠斜連粉堞遙四海交遊空老大一時賓
客更蕭條病來苦愛觀濤賦不分梁園此見招

同張侍御登歷山對華亭

蔡經
閩中

歷下名山秋復登丹崖青嶂鬱層層徑緣采菊行
將徧檻爲看雲悵獨凭遠岫斜陽迷去鳥疎林涼

月送歸僧凌高小結依龍洞坐對華峯翠欲凝
秋日南山氣轉嘉縈迴石磴帶晴沙琳宮上接三
千界雲樹遙連幾萬家千頃蒼茫凌菡萏諸峯羅
列鎖烟霞同遊並是觀風客極目應憐草樹斜

登千佛山寺

潘子震

野寺秋光載酒看詩懷猶爲惜秋殘山空雨濯雲
逾白樹老霜侵葉更丹斜日半窻松影亂懸崖數
滴水聲寒閑來直作藤蘿客誰信刀圭生羽翰

登千佛山

蔡汝楠

出郭偕雙彥登巖扣梵筵松雲龍洞口花雨佛樓
前濟水南流合華峯北斗連照臨齊地小共覽一
燈燃

千佛山

陸鉞

華亭

岱陰烟霧鎖龍宮香閣岩堯翠獻重狂客偶携青
玉杖高僧長住白雲峯瑤燈萬象懸虛照松磬千
巖起暮春蓮社風流吾所羨宦途禪榻未從容

登千佛山寺

鄭芝

虛亭

千佛何年鑿躋攀此日緣乾坤浮華峭雲樹入幽

燕龍去洞無主鶴來寺有仙山靈知客至細雨故
濛然

毛直指邀登一覽亭步韻

中丞李戴

對泉廩延

聯轡登高興不孤上方風景居然殊暮烟深鎖千
家市月色平分一鏡湖岱岳東連識聖脈燕山北
拱壯鴻圖天邊雨露隨驄馬到處霑濡萬卉蘇

登千佛山

中丞王在晉

春郊積翠錦雲連嫩綠新黃色色鮮千佛蓮花香
帶雨孤城雉堞翠生烟高峯東鎖華泉水飛瀑平

分歷下田憶昔旻天呼不應牛羊畝畝苦胼胝

千佛山

劉勅

數里城南寺松深曲徑幽片湖明落日孤嶂挿清
流雲繞山僧室苔侵石佛頭洞中多法水為客况
煩愁

歷山

周鳳瑞

邑人

城頭清曉日曛曛環聳羣峯氣象雄春雨滿犁千
古淚南薰高唱萬年風懸岷水瀉波紋綠絕頂花
開樹色紅入暮環山松籟發依稀猶似理絲桐

登華不注望鮑山

宋曾 登

雲中一點鮑山青東望能令兩眼明若道人心似
矛戟山中那得叔牙城

白雪樓秋夜同許右史分韻 李攀龍

林烟既曳綃湖霞亦被絳鷄犬靜荒村蓬蒿翳深
巷燒微見月出鐘聲識霜降各稱浮白樂未覺呼
盧蔥更賦梁園雪如流華渚虹豫愁還城邑車馬
紛相撞

返照入平陵白雲出西壘天清鴈影澹山空嵐氣

重三徑何蕭條高人乃接踵諸生稷下秀詞客
園寵松菊有佳色琴樽亦慙憊但解不須眠寒燈
坐相擁

酌李東昌寫寄白雪樓圖

樓在濟南郡東三十里許鮑城前望泰麓

西北眺華不注諸山大小清河交絡其下左
瞰長白平陵之野海氣所際每一登臨鬱爲
勝觀東昌李使君子制以讀白雪樓集於廣
川馬中丞家咄然壯之歸爲圖以紀而攀龍
贈焉
如此

詩名東郡沈隱侯那復擅奇顧虎頭江湖菜薄有
能事盡我山中白雪樓推毫已驚海水至無乃兼

驅蛟蜃遊須臾百里岱雲合咫尺疑聞清河流華
不注山得非雨平陵以西胡獨秋松風似欲卷綃
起良久看雲失去留丹青快意癡如此丘壑過人
老卽休使君實解郢中調爲爾深知宋玉愁

魏使君過宿鮑山山樓分賦

李攀龍

層樓風雨一登臨把酒重論十載心楚客豈須題
白壁鮑山猶自見黃金褰帷上國風雲滿伏枕中
原日月深忽憶明光會共被那知萍梗到于今

白雪樓

李攀龍

伏枕空林積雨開旋因起色一登臺大清河抱孤
城轉長白山邀返照迴無那嵇生成懶慢可知陶
令賦歸來何人定解浮雲意片影飄搖落酒杯

夏日襲生過鮑山樓

李攀龍

長白山人本種田談經半住峭湖邊攜來滿甕春
城酒乞得諸生月俸錢倚檻四高滄海色銜盃一
望縉雲天尋嘗雞黍休嫌薄不淺交情二十年

秋日許郭殷見枉鮑山山莊

李攀龍

玉壺春酒石榴殷此日中林見往還惟是樽前幾

知已那能不愛叔牙山

白雪樓夜賦

許邦才

坐我白雲樓翩然解朱綬仙去龍懶從微官是何
物問我平生歡有如此夜不忍將世上名與易杯
中醪

白雪樓

許邦才

秋風百尺樓百壺酒初漉那將千里別騁此千里
目睽我青雲士興文滿瑤牘故園翳蒿萊蕭然雜
松菊霜空鴻雁賓寒原草木熟白髮保窮交俠氣
遜第畜去後屬何人足音復空谷

酌突泉白雪樓

光廬

人去樓空濟水頭欄杆倚遍憶風流白雲黃鶴杳
何處山色溪聲共一樓長夜漫漫千古恨知音落
落書今愁嶺南大雅關同調春鳥嚶嚶自可求

舜井歌

宋歐陽脩

永叔廬陵

岸有時而為谷海有時而為田虞舜已歿三千年
耕田浚井雖鄙事至今遺跡還依然歷山之下有
寒泉向此悲號于旻天無情草木亦改色山川慘

澹生雲烟一朝垂衣止南面臯夔稷契來聯翩功
名德大彼萬世今人過此猶留連齊川太守政之
暇鑿渠開沼流清漣遊車擊轂惟恐後衆卉亂發
如爭先豈徒邦人知樂此行人亦爲留征軒

舜泉

宋曾鞏

山麓舊耕迷故壠井乾餘汲見飛泉清涵廣陌能
成雨冷浸冰湖別有天南狩一時成往事重華王
古似當年更應此水無休歇餘澤人間處處傳

秋日遊清河

任登瀛
邑人

○沿江拖練蕩扁舟乘興重來此地遊滿目青山千
古畫半林紅葉一天秋○杜陵牢落餘詩卷阮籍漂
零只酒甌醉後凭虛思清爽更于何處覓丹丘

百花臺

宋曾鞏

烟波與客同尊酒風月全家上采舟莫問臺前花
遠近試看何似武陵遊

黃臺

金任詢

綠樹橋邊簇錦鞍紅紗影裏照烟鬟歸來書几高
燒燭渾似江鄉一夢間

北極廟

劉勅

廟貌鬱崔嵬溪雲護法臺
凭軒雙日豁倚檻萬峯
來樹影孤帆動香烟古殿開
喜看載酒者一棹任

徘徊

閔子祠

陸鈺

季氏今無邑費公還有堂
松楸汶水意俎豆華山
陽春草寒猶重蘆花絮不揚
采蘋聊駐節彷彿見

宮墻

五龍潭

邑令陳陞

數畝龍潭百尺深環堤垂柳碧
森森一鞭驅得蒼
龍起沛作商家六月霖

五龍潭

李應聘

潭水通樂水靈宮柳岸邊
畫橋浮碧渚玉鏡度飛
泉雷動千林雨雲來萬壑烟
于今粘旱久不許五

龍眠

金線泉

宋曾鞏

石甃嘗浮瀾氣鮮金縵不定路
南泉無風到底塵
埃淨界破水綃一片天

金線泉

谷繼宗 少岱邑人

新春復至舊池亭忽見花開淚欲零金線斜垂天
上月玉繩低度水中星。丁香鳥喙穠華紫丙穴魚
吹細浪青已被羊曇輕賭去何時爛醉倒銀瓶

過黑虎泉留題

中丞胡績宗 天水

濟水城南黑虎泉一泓瀉出玉藍田雪濤飛雨隨
河轉雲液流波到海邊楊柳溪橋青繞石鷺鷥烟
水碧涵天金湯浹野還千古春滿齊州花滿川

灰泉

王象春

灰包泉水出王宮日射金沙魚眼紅別有芙蓉
噴玉韓池北與泮池通

馬跑泉

王象春

將軍戰馬就懸崖石底空聞吼怒雷四鐵一敲冰
雪湧始知赤兔本龍媒

天鏡泉

劉勅

何年開此沼浮岸水盈盈地湧千珠亂天垂一鏡
明靜觀詩思冷閒對酒脾清為語紅塵客臨流好

濯纓

滴水泉

楊衍祚 夔慶邑人

石上寒流滴月明
草堂孤客夢難成
山家漫說無
更說自有泉聲代漏聲

丁香灣

李攀龍

平灣澹不流
寒影千峰入
斜陽一以照
彩翠忽堪

拾

和許史秋日玉函山觀伎

李攀龍

樓臺十二玉欄杆
月出名花映掌寒
自是仙人君
不信只今誰得醉
中看

青鳥翩翩錦字通
玉簫秋冷玉函宮
情知洞裏如花女
共指風流許侍中

玉函觀飲中郎事

許邦才

白石松陰翡翠涼
百花鴈酒芰荷香
鷓鴣唱出佳
人口况在水壺道士房

挾瑟佳人蘇小妍
操觚才子雒陽年
風流絕代還
誰似一派明湖七十泉

過吳子玉函山草堂

李攀龍

玉函山色草堂偏
恰有幽人擁膝眠
樹杪徑迴千

澗合窻中天盡四峰連綠陰欲滿桑蠶月白首重
論竹馬年就此一樽無不可因君已辦阮家錢

九日于鱗招登四里山

許邦才

新詩忽自故人來令節黃花初發醅城外青山城
裏見籬邊那忍獨徘徊

山頭對酌夕陽斜下見湖城十萬家賸有登高酬
令節何人真不負黃花

訪弔枝山來往得四首

錄一

劉天民

城市屢繁誼川原得遐想魏焉愜素遊倏爾脫塵

網白日理旣瑩崇宮靜須養遙見雲中菴何人獨
偃仰

藥山

王象春

陽起石同盟膈膈登山涉海苦蒸黎何如筐阜無
穿鑿猶得花開鳥漫啼

西關赴約回自筐山深恨乏酒

許邦才

豈是邀賓出聊因覽勝來筇聲驚鳥鼠屣齒嚙葑
苔野衲清持硯山花笑索杯明朝尋此路甃掃亂
雲開

桃花嶺

李攀龍

一渡桃花嶺烟霞處處新縱迷源上路猶似武陵人

暮過琵琶山望城市

殷

盤

洗心
邑人

暮過琵琶嶺高頭秋更涼樹晴歸鳥鵲山晚下牛羊雲繞衣裳濕花隨杖履香湖城初出月水遠見天長

望霹靂峯

劉亮采

公嚴
邑人

誰結茅茨野水濱望中山色迥傳神天垂霹靂名何壯盟結林泉事已陳日落欲枯青淚眼雲開如見白頭人清標峻骨還同否幽壑丹崖不可親

鐵牛山

王象春

鐵牛鎮水深埋處還似石鯨嘯晚風月下依稀頭角出時將黑犢飲池中

靜化堂

宋曾鞏

脩巖巘巘背城陰行盡松篁一徑深好鳥自飛還自下白雲無事亦無心客來但飲平陽酒衙退嘗携靖節琴世路人情方擾擾一遊須抵萬黃金

閱武堂

宋曾鞏

五朝環治歸皇極萬里車書共太平胡馬不窺光
祿塞漢家嘗隸羽林兵柳間自詫投壺樂案下方
安佩犢行高枕四封無一事腐儒何幸得專城

魚樂樓

元趙孟頫

樓下南來水清冷百尺深菰蒲終夜響楊柳半谿
陰日月驅人世江湖動客心向來歌舞宴達曉看
橫參

勝槩樓

元趙孟頫

樓下寒泉雪浪驚樓前山色翠屏橫登臨何必須
吾土嘯傲聊因得此生簷外白雲來託宿梁間紫
燕語關情濟南勝槩天下少試倚欄杆眼自明

超然樓

楊衍嗣
元毓邑人

近水亭臺草木欣朱樓百尺會波瀆窻含東海蓬
瀛雨檻俯南山岱岳雲柳色荷香尊外度菱歌漁
唱座中聞七橋烟月誰收却散入明湖已十分

挽暉閣

劉亮采

蒼莽何終極吾生索有涯虛簷凌灝景落日絢丹

五十四
霞朋好音書潤郊關道路賒疎燈明滅處樵牧識
山家

青蘿館

李攀龍

十畝青蘿別館開使君延眺意悠哉風搖北渚清
沙合烟雜南山岱色來臺敞高秋深染翰庭虛斜
日淨啣杯西隣榮叟嘗還往帶索應同薜荔裁

聞韶館

王象春

太師抱器度關山六代遺音竟不還西樂入來天
樂散九歌零落到人間

尹亭夜集

邊貢

憶其尚書飲蘭舟漾渚風芙蓉開月下簫管入雲
中鶴唳烟沙遠螢流水閣通重來值搖落無復往
時同

晃晃波上月稜稜沙際風寒星動木杪遠火露烟
中城郭千峯對園林一水通興移還野酌留賞夜
深同

尹亭宴集

王廷相

戒艤泛澄湖窈窕觀湖埃古柳蔽廻岸雕楹耀丹

水尚書已邈逝亭館麗未已我來夏候變清覽紛
可紀羣水闢菁蒨列岫獻蒼紫篠風旣酒冠花露
亦泫几拳爾小蓬丘宛在水中吐颯颯太雅吟朋
僚况文史伊人昔當路衡準世所恃勲伐茲烟燼
世華一何駛朗鑒無留形空羨山公啓形神竟乘
化今曩豈殊理舞雩協聖符濠梁稱達士悠哉湖
上機吾欲酌清泚

九日集殿卿池亭

李攀龍

卜幽命詞客冠蓋至如糜白雲淡蕭晨黃花媚新
醞灑翰湖上清開樽魚鳥近零落偃池荷淒風隔
籬槿徑回片橋出林暝寒城隱臨流濯長纓飄然
祛塵坌

寒空峭嶺秀霽野湖水潤墟落散城隅池亭入幽
豁雲陰出水鮮石色含霜活白鳥下烟際歸鴻起
天末返照欵長林羣流亂相聒紫鱗壯可持濁醪
美堪掇秋高吹臺興老劇文園渴佳節有獨醒吾
生豈云達

遍除過右史水村江山人同賦 李攀龍

夜來北渚北風急打頭雪花大如筮片紙東飛右
 史書詰朝小作湖中集到門白鳥出高巢繫馬南
 山送人入使君亭中未解醒肅客登筵一長揖地
 僻兼無俗子妨樽空况有隣家給意氣還須我輩
 看功名但任兒曹立瞥眼旋驚青歲徂沾唇莫放
 金盃澀世上悠悠已自諳卽今不飲嗟何及醉聽
 楚調起寒雲絲筆憑陵朱絲濕平生多少伯牙心
 此日因之寄篇釋

五日和許傅湖亭讌集

李攀龍

戴頭片雨懸客醉峭湖邊酒奈榴花妬人堪桂樹
 憐五絲還令節雙鬢抵流年莫蹋王孫草淮南賦
 已傳

青樽臨北渚一爲故人開此事成今昔浮雲自往
 來花間移枕簟鏡裏出樓臺忽就投湘賦深知賈
 誼才

甲戌中秋入北村別業

許邦才

長思卜築傍烟霞百里幽尋不憚賒譚子城東川
 窈窕峭山湖北路迴斜水深蘆荻迷秋鴈雨霽樓

臺見暮鴉禪客欲因開梵宇異人相許即仙家秦
 時浪說桃源隱漢使虛傳蓬海槎空碧看雲消白
 日露清釀酒待黃花有時贏得傾心處咫尺還論
 天一涯

東村即事

李攀龍

不謂幽棲處還堪抱膝吟大雲千里駐片雨二湖
 陰暑逼藤蘿淺涼生栢栢深鮑山終日在知己愧
 黃金

夜半忽風雨柝樓四望孤雷盤華不注雷劃大明

湧雲驚地屏森蛟龍抱劍呼飛揚天地意垂老見

喜筵

城北水村有懷于鱗時居東村 許邦才

湖城烟景曉來新老見年光何太頻門巷異時嘗
 對酒村墟此日各逢春

灤水城邊柳色新峭山村裏白頭人正堪共解金
 華醉負却風流賀季真

正甫泉亭留別

張弓

孤忠身退早背郭結幽亭灤水澄當檻函山翠作

屏秋雲看世態塞馬失功名時日知清座塵心分
外惺

劉觀察魚樂園

光廬

魚磯卜何處山水愛鮮新霞落山成綺風來水結
鱗願扶東漢鼎不染後車塵放浪人間世東山一
隱淪

陳氏水閣

邊貢

吟倚高樓傍檻西碧窻迴覺夕陽低雪消芳渚鷗
爭泛春到垂楊鳥自知商舸過橋帆影亂女牆如
帶草痕齊停杯不盡興亡感六代豪華水一溪

明湖蓮

王象春

五月荷花半壓塘北風直送滿城香當鱸瓶酒魚
鰕菜南客遊來不憶鄉

小淇園

中丞黃克纘

園林葱蒨水縈迴楊柳橋邊載酒來棲鳳琅玕寒
更綠躍魚萍藻涼初開燈光照夜花燃樹香氣迎
風玉吐梅王孟詩名君不忝和歌誰是謫仙才

小淇園

阮以鼎

晉熙

華不注山插霄起。芙蓉影落芳湖裏。滄溟倒瀉天
 河水。下有泉源應星紀。分沙漏石長映空。披蓮繚
 苻紛。揚風遠勢浩滌滌。日月遙光噴薄含烟虹。漚
 茲萬頃壯歷下。何必千里誇江東。湖干窈窕結亭
 屋。陰森蔭以萬竿竹。續取渭川與管谷。湖波竹浪
 影交逐。一幅瀟湘展穠綠。漁船葉葉點輕鳧。歌聲
 款乃遙相續。主人一彈水雲曲。焚香手把南華讀。
 方豎綠髮神脩脩。竹外松風來謾謾。獨秉扶輿堅
 白性。此中更飽江湖興。百折東之斷不回。千尋直
 上存餘勁。塵事紛紛甞豈積。大帑窮簷似懸磬。昔
 心蒿目支九陲。撐柱岷梳權利病。水竹空憐幽意
 便。藉公一柱長扶天。為霖作楫看今日。良弼誰居
 稷契先。

賈園

邊貢

樂水橋西一畝宮。小窻香度碧荷風。老夫野性無
 拘束。便欲移家向此中。

門巷沉沉草迤紆。綠槐深護野人居。馬聲不斷日
 亭午。時有小童來捕魚。

史園再集

邊貢

東道招邀切西園杖履來雲深封古樹沙建老蒼
苔禮數忘機畔寒溫入酒杯垂垂連日雨應爲促
花開

一竿亭

劉勅

一亭獨立水中央萬荷風來滿座香每欲拍船人
不見一溪楊柳帶斜陽

郭丈園亭次潘丈韻

許邦才

幽突泉頭水竹居茅亭松菊更扶疎霜天談讌流
連夕月夜題詩眺望餘塵世本來皆逆旅乾坤何
處不吾廬君家元自遊仙詠况有河陽重起予

劉使君湖上亭十有二韻

許邦才

公幹美才情亭臺不日成柳陰涵竹翠荷氣襲簾
清凭檻看魚集從橋指月生山光城外過鳥影鏡
中明沙溜縈琴曲花源出奕聲流紋牽荇帶蝶拍
接鶯笙醉坐能醒石冥搜不夜城蘭舟無遠近桂
楫更縱橫北郭誰關水斜陽正覆觥尚書鄰舊墅
台閣締新盟今有詩誇古還如孟得名屢過殊不

厭愛此濯塵纓

聞劉文亭改會仙

許邦才

竹樹層層隔世途
蓮花灼灼映丹爐
何人輕授容成術
瞥見明湖即鏡湖

趙氏溪亭

張弓

秋老園林感物華
敗荷殘柳伴枯槎
竹間有徑通茅屋
記得當年賣酒家

蓉泉月崖

劉天民

秋水芙蓉本自奇
月輪可復掛松枝
主人獨坐意何適
費殺長箋水硯詩

月入君家分外明
却緣池水隔花清
客來亦會忘言境
借出水絃弄幾聲

濯錦亭

土象春

簷牙直飲水中間
風送書聲淑氣還
只有此亭高且敞
雨晴欹枕看華山

溪上

元趙孟頫

溪上東風吹柳花
溪頭春水淨無沙
白鷗自信無機事
玄鳥猶知有歲華
錦纜牙檣非昨昔
鳳笙龍

管是誰家令子苦憶東陵子擬向田園學種瓜

十四夜泛舟北灘

邊貢

鷺渚鷗塘靜夜時水行沙立有幽期情知魯叟非
吳客敢謂菱歌是竹枝城外漸看平野濶月中翻
覺遠山奇憑誰喚起王摩詰半入丹青半入詩

玉龍瀑

劉亮采

削壁照丹艘中餘素旆懸飛來桃杏雨界破薜蘿
烟承沫魚爭奮驚濤雁不眠窮源觀物理直欲躡
危巔

之孫耿村道經樂口即事

許邦才

五月誰驅度北川盈盈一水界方田日中臺笠滿
山隩遠道巾車暑雨天詩酒縱人成白首桑榆收
我入青蓮幻泡世味嘗應熟出見紛華七十年

春日同殷少保登望湖亭

許邦才

突兀山椒亦壯哉偶隨賓從上看來居然眼界論
千里瞥爾湖波僅一杯徃徃城頭羅市肆紛紛樹
杪出樓臺長年衰病惟扶枕比老登臨得幾迴

和殿卿神道寺見貽之作

李攀龍

花宮留妙唱，絳筆徧高僧。說法從初地，談詩出上乘。
五言爭刻燭，一字了傳燈。玄度前身是，風流益可憑。

神通寺

許邦才

百里泰山陰，千年號寶林。諸天聞說法，初地問安心。
古殿松聲合，長廊月色深。夢醒禪榻寂，清磬下雲岑。

寤寐東南勝，深秋更一過。青山過橋盡，黃葉擁川多。
丈室因岩穴，經臺上葛蘿。同遊仍抱病，試與問維摩。

維摩

神通寺

李攀龍

相傳精舍朗，公開千載金。牛去不迴，初地花開藏。
洞壑諸天樹，杪出樓臺月。高清楚西峯，落霜淨疎鐘。
下界來豈謂，投簪能避俗。將因臥病白雲隈。

同許右史遊南泉有天井寺

李攀龍

古寺馬蹄前，荒山斷復連。階危孤石倒，崖響亂泉懸。
喬木堪知午，迴峯半隱天。不因許玄度，誰得此攀緣。

同于鱗遊諸山初宿天井寺

許邦才

千峯寒色照驪裘歲暮還堪載酒遊初宿南巖天井寺便聽一夜石泉流

龍游寺

許邦才

何年此地有禪關日暮探奇入萬山塵暗古龕猶定久神龍游去鉢空閒

南泉寺

許邦才

來 驀值覺城開條然般若臺青山香靄合白日雨花

龍集寺

李攀龍

雙林窺壑險一徑入雲愁峯落青蓮色燈懸白日幽香臺高枕出澗水閉門流聞道羣龍集明珠自可求

錦陽川九塔寺觀許右史碑

李攀龍

名山諧夙好况復近吾廬嵐影浮斜照茲川錦不如空林雙樹老寒塔九華疎一片頭陀石新文六代餘

九塔寺

許邦才

何年湧出九華燈古寺深山差變興玄度再來人
已老就中誰是識予僧

華林寺

張弓

十里朝尋古梵宮翠微綠霧濕衣重翻嫌陶令遊
爲晚却恐王維畫未工延客僧攤松檜影杜門犬
吠薜蘿風前身疑是緇衣侶一到烟霞宿信通

步入林泉觀

劉浦仲珠
邑人

到此煩華息山圍若法城嶙峋千峯落清冷一津
橫龍去雲無跡經翻籟有聲轉思王子晉何處自

調笙

子房洞

楊衍祚

野棠開處洞門閒俯瞰中原指顧間雲巖嵒函黃
石去鶴鳴琪樹赤松還冲開碧落崖千尺截斷紅
塵水一灣回首咸陽新日月何如濟上舊雲山

湧泉菴

李攀龍

錦陽川上女僧家紅樹蕭蕭白日斜弟子如雲人
不見可憐秋老玉蓮花

同苗珠泉陶心齋遊白雲洞信宿 張弓

出郭閒身一事無，招携忽上小蓬壺。巖深五月水
猶在，龍去千年草不枯。朱實落時驚宿鳥，碧雲生
處蔭晴湖。追遊俱是烟霞侶，此度登臨興不孤。

八達嶺

劉亮采

多病郎官耳放逐，顛顛將身入林麓。令尹乞得寢
丘田，司空自住王官谷。谷口千山更萬山，八路之
嶺層霄間。游人一望心胆寒，塵埃隔絕如重關。秦
鼎如冠新時祝，旋開一徑通樵牧。順風之呼非加
疾，衆志所同功自速。功成有衆舉欣欣，中有一人

懷蹙吁嗟乎，闢者難爲屬鑿者難爲樸。混沌于今
尤儵忽，君不見桃源好避秦。漁人轉盼失其津，長
袍大袖頻來往。從此商山不重人。

七十二泉

晏 璧
廬陵

酌突泉 渴馬崖前水滿川，江心泉迸蓋珠圓。濟
南七十泉流乳，酌突獨稱第一泉。

金線泉 水紋浮綠影搖金，倒挽銀河百尺深。中
有錦鱗三十六，碧波蕩漾任浮沉。

杜康泉 甘泉一脈舜祠下，此地千年說杜君。不

是重華嘗嗜酒幾卮聊藉解南薰

朱公泉 陶公已泛五湖船尚有芳名寄此泉縈

繞栢鄉風日永濟南別有一山川

白公泉 白公當日浚清渠可灌秋田十頃餘千

載齊民沾地利離離禾黍秀郊墟

舜泉 巍巍舜廟歷城南中有清泉味極甘流出

迎祥仙館去汪汪千頃碧如藍

濯纓泉 石罅流泉可濯纓愛無斧斲自天成

清應挽銀河水應笑滄浪浪得名

甘露泉 盤谷清泉一派長味甘却似飲天漿何

須沆瀣分仙掌滴滴斟來透骨涼

孤孤泉 天麻山北水盈渠山水流傳姓獨孤藥

嶺蘿葱含紫翠清流豈受俗塵汗

湛露泉 泉如湛露味甘香潤入三焦齒頰涼通

樂古園饒爽氣厭厭夜飲醉無妨

雙女泉 二妃釐降有虞城城下流泉冽且清麥

壠黍田資潤澤田公擊壤樂昇平

羅姑泉 阿姑遺迹渺烟蘿贏得流泉尚姓羅陵

谷變遷無限感至今於越慕曹娥

孝感泉 齊城孝子格天心井湧清泉冽且深躍
鯉跡水非好異流傳勝事到于今

玉環泉 泉脉盤迴似玉環天留勝地在人間温
泉曾被楊妃辱故引清流到歷山

南漱玉泉 南泉漱玉派匡廬應是雲門瀑布餘
月照波心清可鑑豈無湘女解瓊琚

北漱玉泉 泉流北澗暴飛瓊靜日如聞漱玉聲
纖手掬來清徹骨高人宜爾濯塵纓

南珍珠泉 禪林南面有流泉流出明珠顆顆圓
一脉清冷猶合浦月明老蚌吐深淵

北珍珠泉 白雲樓下水溶溶滴滴泉珠映日紅
淵客泣來無覓處恐隨流水入龍宮

南甘露泉 佛嶺巍巍青挿天滴來甘露化流泉
南風六月爲霖雨遠借恩波溉井田

龍門泉 西望龍門海藏通香泉一脉透齊東桃
花浪煖春三月鷗化鵬程九萬風

白龍泉 白龍已逐白雲飛鱗甲時時漾綠漪月

白風清天似水一泓元是化龍池

黑虎泉 石磻水府色蒼蒼深處渾如黑虎藏半

夜朔風吹石裂一聲清嘯月無光

黑龍泉 澄潭萬頃碧如油泉水流來石洞幽夜

半龍歸雲霧黑散為膏雨澤齊州

鹿跑泉 泉聲清似鹿呦呦逝者如斯日夜流靈

圃料應非夙昔藤蕪杜若滿滄洲

芙蓉泉 峭華紫翠削芙蓉山下流泉石澗通朶

朶紅粧照清水秋江寂寞起西風

雙桃泉 前度劉郎不再來泉頭幾見碧桃開昨

宵忽夢三偷客滿泛瑤池阿母杯

柳絮泉 金線池邊楊柳青泉分石竇曉泠泠東

風三月飄香絮一夜隨波化綠萍

柳泉 杏花開遍柳垂絲柳下清泉漾碧漪莫折

柔條留繫馬綠陰深處聽黃鸝

胡桃泉 胡桃結實晝偏長樹下清泉帶露香曾

過武陵溪上路落花流水逐漁郎

萑苳泉 泉名萑苳一何清萬事咸繇清苦成寤

寐不忘冰蘂操菜根咬得見高情

金沙泉 白龍泉畔有金沙清水紅蓮勝若耶一

脈直通雲漢路豈無仙客泛靈槎

白花泉 石花流出白花浮喜傍禪林似虎丘好

悟西來空色意世間萬事等浮漚

灰池泉 黑風翻海撼蓬萊吹遍昆明幾劫灰欲

遡水源窮不盡流來歷下淨塵埃

登州泉 登州一脈透譚城澄徹全無蜃氣腥安

得雪堂蘇學士朗吟萬竹濯清冷

王氏溪亭泉 魚池西北水涓涓王氏溪亭尚翼

然溪上槐陰清晝永凭欄徙倚聽鳴蟬

賢清泉 中州文物重譚城故以賢清易水名安

得簞瓢顏氏子秋風來此濯塵纓

東臯泉 金線南泉折向東猶如江漢遠朝宗方

池半畝源頭活難覓魚龍變化蹤

清水泉 灑氣浮空秋水清水天一色月華明滄

浪孺子高歌處一濯塵纓得此名

醴泉 九成曾刻醴泉名歷下泉如竹葉清山水

之間有真樂何須留戀醉翁亭

酒泉 酒星爛爛映青天地下方知有酒泉一酌
飲來甘若醴相逢誰是酒中仙

東蜜脂泉 西池泉味比東強何必天寒割蜜房
莫道脂甘能悅口試將一飲勝天漿

洗鉢泉 淺井東邊有冽泉山僧洗鉢是何年泉
中流出伊蒲饌參透三生石上禪

香泉 虞帝祠前春草芳石池漾漾碧水香源頭
活水恩波遠萬頃坡田穰極黃

散水泉 珠泉東向水縈迴蕩漾漣漪去復來時
有濯纓佳客至方知如鑑濯纓埃

明水泉 清泉一派接銀河寶鑑同明水不波步
繞方池閒顧影鬚眉散作百東坡

皇華泉 金線池東湧碧泉皇華使節耀齊川聖
恩浩蕩寬如海散作甘霖遍八埏

無憂泉 檻泉西畔漱清流酌水能消萬斛愁白
叟黃童爭擊壤春來有事向東疇

滿井泉 川流不息井源盈明秀亭前脉脉清應

是夜來春雨急水高三尺小池平

淺井泉 齊城淺井不盈尺一掬能令塵慮消日

暮兒童餅汲處芭蕉葉上雨瀟瀟

石灣泉 石灣池接檻泉南湧出清流味更甘旋

汲井花烹石鼎嵒華秋淨暮烟涵

臥牛泉 昔聞陶墓有牛眠今見齊州溢井泉千

載歷山遺勝跡秋風禾黍滿虞田

龍居泉 東望扶桑海岱連澄潭月冷水涓涓釣

竿一拂珊瑚樹驚起潭心龍夜眠

馬跑泉 馬蹄踏破迸飛泉流出齊城淺水邊八

駿曾聞馳八極百年幾見海成田

魚池泉 江家亭畔水漣漪無數金鱗逐浪吹只

恐桃花春浪煖龍門一躍化天池

知魚池泉 譚城淺水似濠梁有客觀魚慕老莊

無餌無鈎間罷釣倦眠莎草映斜陽

溫泉 太真偏愛浴華清溫潤何如歷下城玉韞

豈山何借潤不勞薪爨與煎烹

懸珠泉 泉脉如懸黍米珠源頭活水世間無洞

中恐有驪龍臥吐出香涎下峭湖

都泉 遙望中宮廿里餘清泉都滙峭山湖齊城
大旱作霖雨一滴能甦萬物枯

漿水泉 泉流乳竇比瓊漿入口渾疑透骨涼若
作醍醐滋味異較他馬湏更甘香

白泉 槐庭秋水色泓澄體孕金天玉雪清月夜
看來疑素練纖塵不染勝瑤瓊

南煮糠泉 泉通趵突水琳琅濁世還能掃糝練
地境清高隔塵土琪花瑤草四時芳

北煮糠泉 趵突西隅作石棚泉名糟粕待煎烹
一掬可令無塵滓何是當年玷濁名

望水泉 萬竹園中景趣幽雙泉一脉望登州碧
梧百尺棲丹鳳雪浪千堆戲白鷗

熨斗泉 泉如熨斗氣溫溫龍洞分來第一源欲
識坎離交媾意請參道德五千言

染池泉 柳子當年記染溪別分一派出東齊憶
從濯錦江邊過風漾晴瀾五色迷

車泉 漢家聞有七香車歷下車泉賈可嘉金井

輓轡聲軋軋夕陽芳草噪寒鴉

懸泉 百尺深泉石上懸龍歸洞口散晴烟曾從
五老觀飛瀑倒挽銀河落九天

灰泉 珍泉西北帶烟埃亂石堆中觸翠苔何日
塵襟淨蠲條源頭尋路覓天台

混沙泉 曾聞宰相築新堤泉石清佳似灤西亦
有元戎乘小隊時時問柳到幽棲

劉氏泉 泉名劉氏果何人千載風流憶伯倫天
產釀泉清可掬松花滿泛甕頭春

道士泉 北渚南山釀石渦寒泉迸湧寺東坡種
桃道士知何處偏愛靈泉種得多

甲申夏赴任感賦 先祖明末殉節濟南 長洲宋廣業 澄溪

帝念東藩錫此行幸持牙節繼家聲追維祖澤今如
昨敢冀孫枝枯復榮廿載驅車疑夢幻一朝攬轡
矢澄清由來忠孝原無二報國何論世代更

乙酉仲夏

聖駕南巡賜 御書紀恩二首 長洲宋廣業 澄溪

警蹕初回日正長薰風披拂遍齊疆小臣祇謁迎仙

仗 御筆親題出尚方花茂北萱常映綵星連南
 極共騰光欽承異數慈顏喜 賜額榮於百歲坊
 聖恩汪濊德音宣寵錫頻傳自日邊藻麗仙葩攄錦
 繡輝煌寶筵繞雲烟金聲玉振元音叶鐵書銀鈞
 御墨鮮手捧黃羅懽拜舞光華長此戴堯天

關中卽事六絕

長洲宋廣業 澄溪

光搖鎖院萬燈紅禮樂三千大國風多士定饒公
 輔噐由來名相出山東

雪案螢窻挑短檠呀呀永夕歎淒清那知振翻扶

搖上聲徹天衢聽鶴鳴

携琴負劍各紛紜萬卷縹緗闕曛同躍龍門看
 變化才高穩步入青雲

何人不慕早成名握瑾懷瑜各有聲看向至公題
 甲乙當場勝負若楸枰

朱衣列宿自天來奎閣輝煌霄漢開滄海魚龍翻
 巨浪精忠四射現珠胎

我亦頻經上所司回思當日曠傷悲而今袖手旁
 觀切爲國求賢正及時

關中坐雨

長洲宋廣業

澄溪

匹練光搖映碧空，氤氳四起滿齊東。
棘闌辜負中秋月，木榻還驚午夜風。
應是魚龍爭變化，故教雲雨運神工。
諸君努力抒雄思，翰墨淋漓入轂中。

雙忠祠

長洲宋廣業

澄溪

岱嶂瞻巖業，濟水映淪漣。
奕奕櫜題煥，煌煌俎豆鮮。
英靈猶昨日，福德憶當年。
板蕩前朝末，飄搖大厦顛。
北來紛羽檄，東下耀戈鋌。
守土原無責，巡方固有權。
勢危同纍卵，備少剩空拳。
策騎飛馳入，陳師號令宣。
顛闔七䟽上，保障一身肩。
鼓勵人皆奮，艱辛我獨先。
齊心偕茂宰，掣肘遇中涓。
鼎沸千軍集，雷轟萬礮穿。
九霄兵絕援，百折志彌堅。
事去何能挽，城亡不稍延。
凌霜威弗挫，烈炬骨俱燃。
奔赴嗟予父，呼號徹昊天。
鵬啼易欲裂，馬革暴虛傳。
滴血叢骸遍，招魂戰壘還。
陰雲凝慘淡，行路感哀憐。
捍患豐功著，成仁素願全。
黎氓崇享祀，邑令共几筵。
忽值滄桑變，頻驚歲序遷。
聖朝開景運，相國起高騫。
請卹曩時切，揚名此日偏。

贈官從子爵賜額表封阡大節照寰宇芳徽載史
 編貽謀垂勿替繩武媿多愆適奉丹書命來旬紫
 海邊悲思祠从廢咨訪蹟寧湮默賴蒼旻佑欣逢
 憲府賢仙台原在邇木主尚依然公好輿情協精
 忠廟饗專鳩工群力敏趨事衆心虔佳氣克梁棟
 權聲溢井廛事遙經六紀地異出雙泉時吉陔陽
 月風和繞瑞烟穹碑還舊觀椽筆紀新鐫奕葉稱
 苞茂盤根異蜿蜒恪恭盛黍稷肅穆奉栢椿拜跪
 神如在歆歆淚似濺雖云天作合寔迺德為緣環

拱山川秀長留香火編感深心欲折德厚語難詮
 世世當無毀據忱賦此篇

繹志堂二首 在濟東道署中 長洲宋廣業 澄溪

男子初生射四方况今濟濟列鵷行心平體直勉
 裳肅治定功成弓矢揚節奏采蘋循法守詩歌燕
 語靖封疆莫言矍相規模小禮樂兵農佐廟堂
 御筆輝煌賁九天豐碑墓勒永昭宣椽題奕奕雲霞

布屬扇重重鎮嶽連鐵畫銀鈎重世範龍飛鳳舞
 耀宸編但期不朽崇褒錫 聖壽無疆萬歲傳

不匱泉

長洲宋廣業

澄溪

七十八

泰山濟水鎮區寰綿延一脈啓歷山歷山之頂駐
驄馬相傳按部除神姦巡方山左不一人我祖持
斧遇時艱殉節捐軀六十載忠魂凜凜血猶斑於
今改作觀察署以我濫厠於其間我母年高逾耄
臺閭之遂不諱間關旣思爲祖揚忠烈又慮小子
政未嫻輕裝直抵歷山城一腔忠孝淚潸潸余也
仰承我母志亟訪遺跡華井灣雙忠舊址依然在
重修祠宇表市闔神奇特顯雙泉湧我母視之開

權顏更逢

六龍幸齊魯額旌我母真匪頌敬立

碑亭紀

恩寵石罅陡出水漩濺我母齊心供佛

前明心見性悟八遷天鑒忠孝出至誠甘泉載錫
地不慳使者採風嘆靈異爰題不匱非等閒誰謂
濟水不可測源源不竭聲潺湲誰謂泰山不可企
隱隱脈絡相迴環觀此三泉永千古昭昭大節振
愚頑

萬壽亭告成敬賦

長洲宋廣業

澄溪

聖主求民瘼洪鈞轉世屯恩波直浩蕩愛戴出忠純

齊魯荒連歲飢寒痛切身截漕廣賑粟蠲賦絕征
 緝載發公家帑還馳近御臣多方籌軫恤屢詔沛
 深仁冀彼蒼穹格哀茲赤地貧頻年雷雨露比屋
 取禾困雖曰天心佑端由 帝德臻懼愉騰兆姓
 踴躍遍群倫萬壽嵩呼應三多華祝陳豐碑鐫至
 治傑構煥 殊綸突兀雲霄迴輝煌藻采新官室
 歌喜起士庶樂清淳世世當無極年年慶大椿
 再入關中喜雨 長洲宋廣業

憶昔秋霖潤鎖關於今更見雨霽霰淋漓翰墨隨

心湧浩瀚文章任手揮龍螯恰逢雲正合鵬搏佇

看翮將飛來朝變化非常事高躍天池入紫薇

賦

北渚亭賦

宋晁補之 無咎

登爽鳩之故墟兮聯岱宗之獨立根磅礴而維坤
 兮支扶疎而走隰踰琅琊與鉅野兮梁濟濟而北
 出前澗漫而將屯兮後摧囓其相襲圯者扈者嶧
 者垣者礪者礪者障魯屏齊曰惟歷山或肺腑之
 箕拱環連勢厓絕而脉泄兮萬源發于其間谷射

沙山浸滛漑澱澆潏汨泌澎溥渤滴忽瀆起而成
川經營一國其利汾澮防爲井沼壅爲碓磴得平
面肆乃滉漾而滂沛經民廬而貫府舍兮瀦爲池
之千畝惟守之居面巖背阻邈閭閻之遺址兮肇
嘉名於北瀦悲經始之幾何兮牛羊牧而宇籩非
境勝之爲難兮善擇勝之爲難嘗試觀夫淇園千
章之荻合抱之楊立而成阡躋歷下之岩巖望南
山之孱顏脩幹古枝山欄造天藐祖岫之蔽虧乍
髣髴其雲烟思仙人之樓居尚輕舉而高飈盍駕

言其北游登斯渚而盤桓岡巒忽其翔舞荻楊
以如箸撫千里於一呻收城郭於環堵其下波瀾
汗漫葭蘆無畔菱荷蒼藻蘅荃杜蒹衆物居之浩
若烟海歲秋八月草木始衰乃命罾罟觀魚六雁
鳴榔四合方舟順涯鱗鯉窘乎深塘兮鴻鴈起乎
中泝復有桂舫蘭柁浮游其中榜歌流唱自西徂
東纖餌投隈微鱗挂空客顧而嬉傾盃倒鍾明月
出於缺嶺夕陽眇其微紅天耿耿而益高夜寥寥
其方中駭河漢之衝波披海岱之冷風恐此樂之

難留兮願乘槎乎星渚其韓終與偓佺兮采芝英
於瑤圃庶亡老而逸死兮路漫漫其脩阻于是酒
酣太息中座語客曰自昔太公奄有此丘九征五
侯桓公用之攘尊周方其勝時山河十二號涓
東秦臨淄邀樂中興五民秋田青丘實圃海濱而
薛又其小邑也區區之賦食三千人其強孰與比
哉觀華不注竭其孤巘虎牙桀立芙蓉齒齒尚想
三周追奔執鞶下車取飲僅以身免困責贊於蕭
同尚何私乎紀甌而齊自是不競矣夸奪勢

強安在事以日遷而山不改則物之可樂固不可
得而留也認而有之來不可持所玩無故去何必
悲此齊侯之所雪涕而晏子之所竊嘆也今我與
客論古人則知述寫有感而獻歛豈不重惑也哉
仕如行賈孰非逆旅託生理於四方固朝秦而暮
楚曾無必於一笑尚何知乎千古於是客躍然喜
再拜舉觴而前曰凡主人言理實易求而我曠然
已忘昔憂使客嘗滿使酒不空請壽主人如僕孔
公主入亦蹶然喜受飲反觴執客之手而言曰詩

固
有
之
未
見
君
子
憂
心
冲
冲
既
見
君
子
云
胡
不
樂
再
拜
洗
觴
而
酌
客
嘻
然
大
笑

白雲樓賦

元張養浩

吁其高哉茲樓之有如此兮括萬象於宏敞飛西
阿於鴻冥初疑陽侯海底鞭出一老蜃噴雲噴霧
扶輿五色凝結而成形又疑大鵬九萬失羊角踞
此勝境而不去兮翼截華鵠之烟雨兮背摩霄漢
之日星俄來宜鬱一登眺兮衆山故爲出奇秀恍
然身世遊仙庭憑欄俯視魄四散耳根但聞風鐵

音冷冷上有浮雲客與臥蒼狗下有驚濤澎湃奔
流霆憶昔我公分符握節尹東土聲名遐邇流芳
馨脯鱗膾鳳羣賢方此高宴不意有好閭境闔城
萬室無一寧公乘疾傳出閣上亂臣必討存儲經
雄兵一夕自天至縱餘渠帥獨典刑九重賜券且
與盟帶礪寵光浮動堂與庭惜余才疎生晚後饑
會不及奮筆爲擬燕然銘雄心霸氣龍韜虎畧見
無復空聞燕雀鳴幽巖當時風景今盡易惟存風
光山色無年齡朱簾香歇桂花老金鋪色暗苔痕

青長歌慷慨弔陳跡風動彷彿來英靈忽然感春色
白遠而至今斷霞斜照互明滅詩成欲掃雲間屐
貪徵興廢玩餘景須臾不覺一輪明月升東溟
贊

宋真宗御製孔子贊

立言不朽垂教無疆昭然令德偉哉素玉人倫之
表帝道之綱厥功實茂其庸允臧升中既畢盛典
載揚洪名有赫懿範彌章

至聖贊

中丞陳鳳梧

天

一以貫之金聲玉振是謂大成賢於堯舜教存六
經道該羣聖生民以來未有獨盛

聖賢贊

在縣庠
有碑亭

中丞陳鳳梧

伏羲贊 於惟神聖繼天立極仰觀俯察卦爻斯
畫始造書契以代結繩開物成務萬古文明

神農贊 聖皇繼作與天合德始嘗百草以濟天

札農有耒耜市有交易澤被生民功垂無極

黃帝贊 帝德通變神化宜民垂裳而治上軋下

坤井野分州迎日推策百庶惟熙萬世作則

帝堯贊 欽明揖遜德協萬邦巍乎成功煥乎文

章天地之文日月之光允執厥中道冠百王

帝舜贊 重華協帝授受於唐惟精惟一濟哲文

明兩階于羽九韶鳳凰恭已無言萬世綱嘗

禹王贊 文命四敷三聖一心有典有則克儉克

勤成功不伐善言則拜九州攸同萬世永賴

湯王贊 勇智天錫聖敬日躋建中於民萬邦維

懷顧諟明命肇脩人紀垂裕後昆道統斯啓

文王贊 文德之純於穆不已肅肅雝雝緝熙敬

止後天八卦昭如日星大哉易繫式開太平

武王贊 丕顯文謨丕承武烈偃武脩文天下大

悅丹書之受洪範之咨百王遺緒一代丕基

周公贊 天生元聖道隆德備制禮作樂經天緯

地上承文武下啓孔顏功在萬世位參兩間

孔子贊 道冠古今德配天地刪述六經垂憲萬

世統承義皇源啓洙泗報德報功百王崇祀

顏子贊 天稟純粹一元之春精金玉和風慶

雲博文約禮超入聖門百王治法萬世歸仁

曾子贊 守約而博學恕以忠聖門之傳獨得其宗一貫之旨三省之功格致誠正萬世所崇

子思贊 精一之傳誠明之學聖門嫡派斯道有托發育洋洋鳶飛魚躍慎獨之訓示我先覺

孟子贊 哲人既萎亞聖斯作距諛闢邪正論譎諤堯舜之性仁義之學烈日秋霜泰山喬嶽

七忠贊

學使周應治

鐵鉉 維物堅剛孰有逾鐵公以系姓豈天植耶見事風生讞獄電決見器

高廟才節昭揭薇垣餉師水陸不忒城守東藩既破

復飭懸板幾中淮陽逐北中原寒心北平失色詎

知天授大內自焚豈不戴天心戀舊君顧盼難得

妻子奚論雖膏鼎鑊忠稱帝闈舊國有憾故園無

家女亦貞義有識共嗟雄才揮霍勁節孔嘉磨光

日星撐持岱華

陳迪 有歿而光有生而缺蘭蕤芳存玉碎晶裂

猗與少保骭體不羣起家辟召通籍詞林惠流海

岱威著南溟文昌八座眷亦殊焉受知國士為殷

頑民一醜靡改九死不臣身同子磔名共日赫氣
壯山河血化萋碧雨水明鏡雙橋落虹有祠峩然
膽肅高風媿彼奸諛覲顏二天晚陵猶生玉潔蘭
荃

胡子昭 靖難入繼自其家事事非瞻烏何謂就
義原本

皇祖精忠豎幟三十年間雷厲厥卒公性耿介希古
同流獻賦蜀都較史天球麾招莫動淮南寢謀豈
有他腸各爲分憂大物旣收有力負舟株連繩引
死又何求上酬國恩下謝從遊蜀有專祠各有遺
休丹心皓月萬古清秋

丁志芳 泉不歸山雨不上天冰霜隨化金石謝
堅丈夫正氣獨往無前栗烈堅剛有折靡遷公起
甲科委質革朝風高烏府聲著吳橋同時黃練共
効賈晁刻核太至烽燧是挑北平日張境土日蹙
一木莫支嚮師而哭豈不能去鼠竄是憊豈不能
臣賜張其腹潛遣妻子獨以身留我頭可截我節
自道節俠惠文氣結蜃樓仁必有後天不謬悠勇

足報主智能全嗣埒彼鴟夷託後齊使龐復爲丁
忠且蒙謚赫赫御史智勇且備

高巍 惟辯襄節推孝移忠遼州旣孝艾母何豐
錄用先朝建白摩空分王諸王晁策賈衷書請罷
兵射燕遺風從戎南潰羈旅于東墨守濟南與鐵
同功寧不如烏胡集于枯臣哉鄰哉艱難是扶豈
如弁髦敝因改圖詎彼管魏自甘溝塗冰心一賦
慷慨丈夫高山可仰青簡不污

鄭華 有賊景隆殊寵專征金川失守賣主逢
彼狡童俊鎮江專城一矢未遺首豎降旗行人散
地判官下陳東平未蒞癘然經生驅車難就天爲
震驚力疾戰死力獲瓊瑛螳怒胡益犬吠見貞彼
李童子人面強行孤忠論定

仁廟有評誰曰傷勇振古之英

王省 秩不必崇祿豈在膺恤緯憂深懷沙心苦
秉鐸雖微風教是主祿焉避難罷士儔伍齊黃之
死難端自紐其他族 皆繇掣肘非公生亂何嫌
何咎升斗君粟抱關君守明倫大呼觸柱碎首烈

峻文山清徹濟瀏祗成個是遑恤死所汨羅首陽
同此遐舉

銘

洗心銘

有碑在黑虎泉

鄒善

有物無朕不可垢斯覓垢從生了不可知酌彼檻
泉江漢濫之退藏于密皜皜莫窺

歷城縣志卷十四止